

Gerente General di Repsol:

Optimismo ta grandi sino no a inicia cu e di dos etapa di sondeo pa gas

ORANJESTAD(AAN): E di dos etapa di sondeo cu ta ser haci pa Repsol den awanan teritorial di Aruba den e proceso di exploracion di gas, ta forma parti di henter un proceso cu ta contene diferente etapa.

Den e prome etapa cu a inicia aña pasa dia 20 di December di 2012 cu tabatin un duracion di un aña y mei caminda a haci

e testnan riba un area di 3200 kilometer cuadra mientras cu na lunadi Juli ultimo, a inicia e siguiente fase di e proceso 3D y caminda lo bay haci tres bes mas sondeo di locual a worde palabra inicialmente, cu tabata pa un sondeo.

Gerente General Willy Hernandez a mostra cu e prome etapa


pa di e sondeo, tabata pa identifica e arkitektura zoologia di e area y determina e areanan cu tin mas potencial di ta contene hidrocarburo. E ora a bay over na eligi algun area caminda a bay over na efectua un sondeo 3D caminda tin miho definicion di e posibilidadnan y caminda ta kere cu por tin mayor exito.

Den e actual proceso ta haci

sondeo pa bay over na determina e areanan cu nan ta kere e posibilidad ta mucho mas grandi y asina dicidi cual ta e areanan caminda lo bay haci perforacion pa sigui e ora cu e siguiente etapa.

Loke sr Hernandez a mostra ta cu na e momentonan aki, Repsol a bin ta cubriendo un zona cu ta tres bes mas grandi cu loke a keda palabra den nan contracto y e proceso actual lo keda conclui na luna di september venidero.

Tur informacion acumula den e di dos fase aki, lo worde acu-



mula pa despues bay worde analisa den e centro di analisis na Houston cu lo procesa esakinan y den un periodo di 7 pa 8 siman Repsol lo ricibi e datonan den e formato cu nan ta spera cu nan tin mester pa bay over na tuma decisionnan riba futuro exploracion di gas.

Na luna di November di 2015 lo ta asina leu cu mester defini si ta bay sigui cu e proceso di exploracion di gas of ta termina cu e contracto cu tin actualmente.

Sr Hernandez a mostra cu ta existi sin duda hopi optimismo ya cu si no tabata asina, lo no a inicia cu e di dos etapa di e sondeo pero tur cos ta depende di e informacionnan cu ta ser ricibi a base di e proceso cu ta tumando luga actualmente.

El a mostra cu e posibilidad hasta ta existi cu riba frontera dos pais por comparti henter e proceso di exploracion di gas ya cu e teritorionan ta pega na otro pero ta un situacion cu ta existi rond mundo y cual paisnan semper a coopera cu otro den e tipo di situacionnan aki.

Repsol tin varios actividad den e region di Caribe y Suramerica pero ta sigui kere den e proceso actual cu ta canando den bon direccion.

Gerente General di Repsol a mostra cu den e zona caminda ta haciendo e estudionan na e momentonan aki, ta un region practicamente virgen caminda no tin actividad di boramento tumando luga y e optimismo ta keda existi ya cu di otro forma no a sigui cu e siguiente proceso di sondeo cu actualmente ta tumando luga.

Fuera di hopi atencion pa e proceso di sondeo, sr Hernandez a mostra cu tin atencion total pa e bida marina y tur cos ta ser haci pa no causa daño na delfin, turgu, bayena y otronan, y asina cu detecta presencia di e bestianan aki na momento cu e barco ta moviendo, ta tuma medida di precaucion y caminda tin dos experto a bordo di e barco cu ta atende cu e bestianan te ora cu nan ta riba un distancia adecuado.

Asina cu un di e bestianan ak acerca e boto cu na e momentonan aki ta haciendo su testnan sismico, y ta den e distancia di 500 meter, ta para e proceso te ora cu e bestianan aki aleha y keda na un distancia cu no ta causa daño na esakinan.

Apesar cu e aspecto di proteccion di e bestianan aki no ta pon den e contracto cu tin actualmente pero e compania semper a hiba e manejo di proteccion di cualkier bida marina.